

孝

經

集

解

孝經

趙起蛟集解

孝治章第八

邢昺正義曰。夫子述此明王以孝治天下也。前章明先王因天地順人情以爲教。此章言明王由孝而治。故以明章。次三才之後也。○愚按此爲刑誤傳之四章。釋民用和睦。上下無怨。吳草廬較定今文本。爲傳之二章。釋以順天下。民用和睦。上下無怨。又章內言以孝治天下。

而得和平之福應。豈非以順天下。民用  
和睦之實效哉。

子曰。昔者明王之以孝治天下也。不敢遺小  
國之臣。而况於公侯伯子男乎。故得萬國之  
懽心。以事其先王。

按邢昺正義曰。章首稱子曰者。爲事訖更  
別起端首故也。昔者。謂先代。非當時代之  
名。明王。明哲之君。左傳。照臨四方曰明。則  
聖王之通稱也。正義曰。還指首章之先王。

以代言之。謂之先王。以聖明言之。則爲明王也。以孝治天下。謂天子能孝於先王。而推其愛敬於一家一國。以及天下之萬國也。遺。忽忘也。謂忽之而不加禮。忘之而不省錄。小國之臣。土地褊小。不能五十里。附於諸侯曰附庸。是也。一說。謂子男之卿大夫。先王建國。公侯地方皆百里。伯七十里。子男五十里。舊解云。公者。正也。言正行其事。侯者。候也。言斥侯而服事。伯者。長也。爲

一國之長也。子者字也。言字愛於小人也。男者任也。言任王之職事也。萬國極言其多。正義曰。猶言萬方。是舉多而言之。不必數滿於萬也。事其先王。天子無生親可事。故曰先王。經稱先王有六。曰先王之至德要道。曰先王之法服。先王之法言。先王之德行。曰先王見教之可以化民。邢昺曰。此皆指先代行孝之王。此章云以事其先王。則指行孝王之考祖也。○鄭氏曰。先代聖

明之王。以至德。要道化人。是爲孝理。○邢  
昺曰。此釋孝治之意也。○鄭氏曰。小國之  
臣。至卑者耳。王尚接之以禮。况於五等諸  
侯。是廣敬也。○按五等。公爲上等。侯伯爲  
次等。子男爲下等。○董鼎曰。推其愛敬之  
心。至於附庸小國之臣。尚不敢有所遺忘。  
小國之臣。且不敢遺。而况於公侯伯子男  
大國之臣乎。○鄭氏曰。行孝道以理天下。  
皆得歡心。則各以其職來助祭也。○董鼎

曰。以萬國之衆。而皆得其懽悅之心。則尊君親上。同然無間。人心和而王業固。社稷靈長。而宗廟奠定。以此事奉其先王。則孝道至矣。後世之君。不皆然者。不明不誠。故也。明足以有見。而知事理之必然。誠足以有行。而不忘於微賤。則萬國歸心。先王世享矣。夫子所以首稱明王。而斷言其不敢。蓋不敢之心。則祇懼之誠也。卽經言天子之孝。不敢慢惡於人是也。○朱申曰。古者

明德之王。其以孝道治天下也。雖小國之臣。猶不敢遺棄之。何況公侯伯子男。乃五等之諸侯。而敢遺棄之乎。所以能得萬國諸侯懽悅之心。諸侯各以其職來助祭於先王也。○愚按此申明天子愛敬之推於下者而言。不敢遺。卽不敢惡慢之意。公侯伯子男。與小國之臣。皆人之屬。以言天子。故特舉君長而言。不及細民也。事其先王。而得萬國之懽心。可以見上之施愛於下。



者。及身而止。下之致愛敬於上者。兼隆乎祖考。治天下誠貴夫孝。而孝誠在乎愛敬也。

治國者。不敢侮於鰥寡。而况於士民乎。故得百姓之歡心。以事其先君。

治國。以孝治其國。鄭氏曰。謂諸侯也。邢昺曰。上言明王理天下。此言理國。故知諸侯之國也。侮。謂忽之而不矜恤。老而無妻曰鰥。老而無夫曰寡。此二者。則所謂天下窮

民與夫疲癯殘疾顛連無告皆在矣。一命以上爲士。民則農工商賈也。諸侯有卿大夫。只言士民亦舉小以見大耳。百姓或謂百官族姓。或謂民之族姓。或謂以上文萬國列之。當是官族大夫之家。總不如邢氏言百舉其多。一語爲當耳。皆是君之所統理。故以所統言之。先君始受命爲國君者也。諸侯亦無生親可事。故以事其先君爲孝。○鄭氏曰。鰥寡國之微者。君尚不敢輕

侮。况知禮義之士乎。諸侯能行孝理。得所  
統之。懽心。則皆恭事。助其祭享也。○祭享。  
邢昺曰。謂四時及禘祫也。於此祭享之時。  
所統之人。則皆恭其職事。獻其所有。以助  
於君。○朱申曰。古者諸侯以孝道治一國。  
雖鰥寡。猶不敢侮慢之。何况其國之士與  
民。而敢侮慢之乎。所以能得一國百姓懽  
悅之心。百姓皆恭事。以助祭於先君也。○  
董鼎曰。自天子以孝治天下。而諸侯亦以

孝治其國。推其愛敬之心。以及於國人。至於鰥寡之微。亦不敢侮慢之。而况於士民乎。以此之故。所以得百姓之歡心。百姓之心。無不懽悅。則能和其民人。保其社稷矣。以此而事奉其先君。豈非孝道之大者乎。此與前言諸侯之孝相發明。不敢侮鰥寡。卽不驕不奢之極。得百姓之歡心。卽長守富貴之本也。○愚按此申明諸侯愛敬之推於一國者而言。蓋鰥寡士民。皆天子所

寄托。而先君所保護者。一念及此。則愛敬之勿暇。而敢侮乎。觀於不侮百姓。咸發其愛敬之懽心。以及夫先君。誰謂鰥寡士民。可侮哉。

治家者。不敢失於臣妾。而况於妻子乎。故得

人之懽心。以事其親。况於妻子乎。故得人之懽心。以事其親。一本作于。懽。一本作歡。

不敢失。一本作不敢侮。

治家。以孝治其家。謂卿大夫也。而士庶人亦并舉矣。失。謂不得其心。臣妾。家之賤者。

妻子。家之貴者。古者卿置側室。大夫有貳宗。士有隸子弟。庶人工商。各有分親。皆所謂臣妾也。人通妻子臣妾而言。其親。邢昺曰。天子諸侯繼父而立。故言先王先君也。大夫唯賢是授。居位之時。或有俸祿以逮於親。故言其親也。○鄭氏曰。卿大夫位以材進。受祿養親。若能孝理其家。則得小大之懽心。助其奉養。○邢昺曰。禮記內則稱子事父母。婦事舅姑。日以雞初鳴。咸盥漱。

以適父母舅姑之所。問衣煖寒。饘醢酒醴。芼羹菽麥。簞稻黍粱秫。唯所欲。棗栗飴蜜以甘之。父母舅姑必嘗之而後退。所謂助其奉養也。○朱申曰。古者卿大夫以孝道治其家。雖家臣女僕之賤。猶不敢侮慢之。何況其家之妻與子。而敢侮慢之乎。所以能得其家人懽悅之心。家人皆相助奉養其親也。○董鼎曰。臣妾賤而疎。妻子貴而親。人之情。常厚於親貴。而薄於疎賤。而昔

之爲卿大夫。以孝治其家者。惟其愛敬之心。下及於臣妾。曾不敢以少有失於臣妾之心。彼疎賤者尚如此。而况於妻子之親責乎。則不失其心可知矣。是以無貴無賤無親無疎。皆得其人之懽心。而有以事其父母矣。○愚意此申明卿大夫愛敬之推於一家者而言。蓋臣妾妻子。皆當愛敬於我者。然我先無以盡其愛敬之實。是失於臣妾妻子矣。而責臣妾妻子之相助爲理。



以愛敬吾親得乎。故治家者能盡其愛敬以及於臣妾妻子。則臣妾妻子亦莫不各殫其愛敬。以及於吾親也。又邢氏引內則奉養之文。竊恐奉養亦多端。此特其一節耳。然子婦之能盡此者。蓋亦鮮矣。○按明王言不敢遺小國之臣。諸侯言不敢侮於鰥寡。大夫言不敢失於臣妾者。劉炫云。小國之臣位卑。或簡其禮。故云不敢遺也。鰥寡人中賤弱。或被人輕侮欺陵。故曰不敢

侮也。臣妾營事產業。宜須得其心力。故云不敢失也。明王况公侯伯子男。諸侯况士民。卿大夫况妻子者。以王者尊貴。故况列國之貴者。諸侯差卑。故况國中之卑者。以五等皆貴。故况其卑也。大夫或事父母。故况家人之貴者也。

夫然。故生則親安之。祭則鬼享之。是以天下和平。災害不生。禍亂不作。故明王之以孝治天下也如此。

一本如此  
上無也字

此總結治天下國家三節。夫然。猶言惟其如此也。故。猶言是以如此也。生。謂父母存時。祭。謂沒世奉祀。安者。其心無憂。享者。其覓來格。一說。親安。指事親者而言。鬼享。指事先君先王者而言。人死曰鬼。氣屈而歸也。○鄭氏曰。夫然者。上孝理皆得懽心。則存安其榮。沒享其祭。○舉天下。則國家在其中。和平。謂各得懽心。而無有乖戾偏跛也。天災之甚者爲害。人禍之甚者爲亂。如

饑饉疾疫。兵戈盜賊之類。○鄭氏曰。上敬下懼。存安沒享。人用和睦。以致太平。則災害禍亂。無因而起。○邢昺正義曰。皇侃云。天反時爲災。謂風雨不節。地反物爲妖。妖卽害物。謂水旱傷禾稼也。善則逢殃爲禍。臣下叛逆爲亂也。○吳澄曰。由鬼享而上達。則天道順而無災害。由親安而下達。則人道順而無禍亂。此以孝治天下之極功也。○鄭氏曰。明王以孝爲理。則諸侯以下

化而行之。故致如此福應。○正義曰。福。謂天下和平。應。謂災害不生。禍亂不作。又邢氏曰。上文有明王諸侯大夫三等。而經獨言明王孝治如此者。言由明王之故也。則諸侯以下。奉而行之。而功歸於明王也。○朱申曰。天子諸侯卿大夫。皆得懼心。則父母生而安其榮養。父母死而爲鬼。則享其祭祀。所以天下人心和睦。以致太平。和則災害無由而生。平則禍亂無由而作。明王

以孝道治天下。其效有如此。○董鼎曰。天子諸侯卿大夫皆以孝治天下國家。而得人之懽心。以事其親如此。故其生而存。則親安之。沒而祭。則鬼享之。由其心意之素安。所以竟氣之易感也。是以普天之下。既和且平。和則無乖戾之氣。故災害不生。平則無悖逆之事。故禍亂不作。災害如水旱疾疫生於天者也。禍亂如賊君弑父作於人者也。孝者天之經。地之義。而人之行也。

人人盡孝。則心和氣和。而天地之和應矣。夫子遂總結之曰。故明王之以孝治天下。如此。蓋由天子身率於上。諸侯以下化而行之。所以至此。皆明王之力也。又引抑詩以明之。○愚按天子統諸侯卿大夫士庶而天下。該國與家。故篇首以明王孝治天下起。末以明王孝治天下結也。夫孝之理。同出於一原。而愛敬之施。則各有所當然之分。天子不能下兼。夫諸侯卿大夫士庶。

卽諸侯卿大夫士庶亦不能上干夫天子也。所以明王下。仍分諸侯之孝治。卿大夫之孝治。而士庶之孝治。已包舉卿大夫內。不言士庶者。同屬有家故也。夫然節發明孝治之驗。天子諸侯卿大夫通言者。見人子奉事父母之禮雖殊。而父母致望人子之心則一。故不復清還也。天下有天下之災害禍亂。國家有國家之災害禍亂。而能各盡其愛敬以成夫孝治。則不災不作。天



下國家一而已矣。

詩云。有覺德行。四國順之。

行。下孟反。○詩大雅抑之篇。覺大也。大德  
行。卽謂至德要道。四國順之。謂東西南北  
四方之國。皆興於孝而爲順也。○鄭氏曰  
義取天子有大德行。則四方之國。順而行  
之。○董鼎曰。以明明王以孝治天下。故諸  
侯卿大夫皆以孝治其國家也。○愚按此  
詩衛武公刺厲王。亦以自警而作言能全

其德行而覺然直大。則人心無不率從而四國其順之矣。引此以明孝治感人之速如此。○范祖禹曰。天子不敢遺小國之臣。則待公侯伯子男以禮可知矣。上以禮待下。下以禮事上。而愛敬生焉。愛敬所以得天下之歡心也。以萬國歡心而事先王。此天子孝之大者也。治國者不敢侮鰥寡。則無一夫不獲其所矣。以百姓歡心而事先君。此諸侯孝之大者也。伊尹曰。匹夫匹婦

不獲自盡。民主罔與成厥功。天子之於天下。諸侯之於一國。有一夫不獲其所。一物不得其養。則於事先王先君有不至者。治家者。遇臣妾以道。待妻子以禮。然後可以得人之歡心。而不辱其親矣。自天子至於卿大夫。事親以歡心爲大。天子必得天下之心。諸侯必得一國之心。卿大夫必得人心之心。乃可以爲孝矣。夫知幽莫如顯。知死莫如生。能事親則能事神。故生則親安之。

祭則鬼享之。其理然也。災害。天之所爲也。禍亂。人之所爲也。夫孝致之而塞乎天地。溥之而橫乎四海。推一人之心而至於陰陽和。風雨時。故災害不生。禮樂興。刑罰措。故禍亂不作。詩云。有覺德行。四國順之。以天下之大。而莫不順於一人。惟能孝也。

男 飛鵬  
鳴謙 校對

孝經

趙起蛟集疏

聖治章第九

邢昺正義曰。此言曾子聞明王之治。以  
致和平。因問聖人之德。更有大於孝否。  
夫子因問而說聖人之治。故以名章。次  
孝治之後。○愚按刑誤。此章亦刪去九  
十餘字。離爲二章。自曾子曰。敢問聖人  
之德起。至所因者本也。爲釋孝德之本  
章。父子之道上。漆子曰。字至。謂之悖禮。

爲釋教之所由生章。以順則逆下。悉在  
所刪。有謂不愛其親語意。正與上文相  
續。古文析之別爲一章。非是。當以今文  
爲正。又謂悖禮以上。皆格言。以順則逆  
下。則雜取左傳所載季文子北宮文子  
之言。與此上文不相應。故刪去。又上章  
言明王之治。不外於孝。此章言聖人之  
德。亦無加於孝。而極之祖父。可配天地  
正申明首章夫孝德之本意。

曾子曰。敢問聖人之德。無以加於孝乎。一本無以

上多其字。於。一本作于。

鄭氏曰。參問明王孝理以致和平。又問聖人德教。更有大於孝不。○邢昺正義曰。夫子前說孝治天下。能致災害不生。禍亂不作。是言德行之大也。將言聖德之廣。不過於孝。無以發端。故又假曾子之問而釋之。○董鼎曰。曾子既聞明王以孝治。其極至之效如此。於是又推廣而言。敢問夫子聖

人之所以爲治者固皆本於孝矣。不知聖人之所以爲德者果無以加於孝乎。抑亦有在於孝之上。可以致理成化。過於此者乎。○愚意曾子以聖人道全德備。或不止此。故疑其有加。非以聖人爲可外乎此。而問也。

子曰。天地之性。人爲貴。人之行。莫大於孝。

於

本作于。

行下孟反。○按性者。人物所得以生之理。



也。性命於天。而兼言地者。萬物資乾健以始。資坤順以生。地有成物之義。故兼言地也。貴者殊異可重之名。鄭氏曰。貴其異於萬物也。莫大云者。鄭氏曰。孝者德之本也。○董鼎曰。天以陽生萬物。地以陰成萬物。天地之生成萬物者。雖以陰陽之氣。然氣以成形。而理亦賦焉。故夫子言人所稟受於天地之性。則比萬物爲最貴。以能與天地參爲三才也。以天地之性言之。則人爲

貴以人之行言之。則孝爲大。何地。人稟天地之性。不過仁義禮智信。五者而已。專言仁。又爲人心之全德。禮義智信皆包括於其中。仁主於愛。愛莫先於愛親。故仁之發見。如水之流行。親親爲第一坎。仁民爲第二坎。愛物爲第三坎。此人所行之行莫大於孝。人惟不知孝之大也。是以失於自小。惟不知人之貴也。所以失於自賤。自賤則雖有人之形。無以遠於禽獸矣。自小則雖

有聖賢之資。無以拔於凡庶矣。此夫子答曾子之問。必先之曰。天地之性。人爲貴。人之行。莫大於孝。所以使人知所自貴。而先務其大者。董仲舒謂必知自貴於物。而後可與爲善。亦夫子之意也。○吳澄曰。人物均得天地之氣。以爲質。均得天地之理。以爲性。然物得氣之偏。而其質塞。是以不能全其性。人得氣之正。而其質通。是以能全其性。而與天地一。故得天地之性者。人獨

爲貴。物莫能同也。性之仁義禮智統於仁。仁之爲愛先於親。故人率性而行。其行莫大於孝也。○愚按人爲萬物之靈。故貴。孝爲百行之原。故大。聖人亦人耳。豈能加毫末於是哉。

孝莫大於嚴父。嚴父莫大於配天。則周公其人也。

兩於字一本作于。

嚴。尊敬也。配。對也。周公。文王子。武王弟。成王叔父也。名旦。食采於周。位居三公。故稱

周公。○鄭氏曰。萬物資始乎乾。人倫資父  
爲天。故孝行之大。莫過尊嚴其父也。○邢  
昺正義曰。人倫資父爲天者。曲禮曰。父之  
讐。弗與共戴天。鄭玄曰。父者。子之天也。殺  
已之天。與共戴天。非孝子也。杜預左氏傳  
曰。婦人在室。則天父出。則天夫。是人倫資  
父爲天也。○鄭氏曰。謂父爲天。雖無貴賤。  
然以父配天之禮。始自周公。故曰其人也。  
○邢昺正義曰。以父配天。徧檢羣經。更無

殊說。按禮記有虞氏尚德。不郊其祖。夏殷始尊祖於郊。無父配天之禮。周公首行之也。○董鼎曰。人子之孝於親者。無所不至。而莫大於尊敬其父。尊敬父者。亦無所不至。而莫大於配享上天。惟天爲大。尊無與對。而能以已之父。與之配享。所以尊敬其父者。至矣。極矣。不可以復加矣。然仁人孝子愛親之心。雖無窮。而立綱陳紀。制禮之節。則有限。求其能盡孝之大。而嚴父以配

天者。則惟周公其人也。中庸曰。武王末受命。周公成文武之德。追王太王王季。上祀先公。以天子之禮。制爲嚴父配天之禮者。周公也。故夫子稱之。○愚意此承上莫大之意。而節舉其一端也。蓋孝以嚴父爲大者。見孝之節文雖多。總莫出於敬也。敬父以配天爲大者。見敬之條目不一。而總無加於配天也。配天之禮。後世踵行。而始制厥典。寔惟周公。故曰。則周公其人也。夫周

公聖人也。以聖人之德。而攝天子之政。又  
有其位。故得制爲嚴父之禮。以盡其孝之  
心。使有其德而無其位。則周公亦止於其  
分之所當爲。雖知嚴父莫大於配天。而不  
敢越禮犯分以行矣。

昔者周公郊祀后稷以配天。宗祀文王於明  
堂以配上帝。是以四海之內。各以其職來祭。  
夫聖人之德。又何以加於孝乎。

一本來下多助字。兩於字。

一本作于。



夫音扶○郊。祭天於南郊。故曰郊。鄭氏曰。謂園丘祀天也。后稷。周始祖。按后稷名棄。其母有邠氏女曰姜嫄。爲帝嚳元妃。出野踐巨人跡。身動如孕。居期而生。蓋不由人道。以爲不祥。棄之隘巷。牛羊避不踐。徙棄之平林。會伐平林者收之。遷棄寒冰之上。飛鳥偃翼覆藉之。姜嫄以爲異。遂收歸長養。因名曰棄。兒時好種樹麻菽。及爲成人。好耕農。帝堯舉爲農師。帝舜命爲稷。使教

民播種百穀。封於甸。爲諸侯。君其國。故曰  
后稷。自后稷至王季十五世。而生文王昌。  
宗祀。宗廟之祭也。按天子七廟。祖廟一。昭  
廟三。穆廟三。祖廟百世不毀。昭穆六世後。  
親盡則祧。其有功德當不祧者。謂之宗。以  
親盡則祧論。文王於武王成王時。居穆廟  
之三。康王昭王時。居穆廟之二。穆王共王  
時。居穆廟之一。至懿王時。文王親盡在三  
廟之外矣。以其不當祧也。故於穆廟北別

立一廟以祀文王。是名爲宗。不在文廟之數。穆王以前。文王雖未別立廟。遷居三穆廟中。然卽其所居之廟。亦名爲宗。蓋初附廟時。已定爲百世不祧之宗。故也。明堂者。廟之前堂。凡廟之制。後爲室。室則幽暗。前爲堂。堂則顯明。故曰明堂。享人鬼。尚幽暗。則於室。祀天神。尚顯明。故於堂也。或曰。取南面向明之義。○愚意明堂。王者所居以出政令之所。爲東嶽朝諸侯之明堂。齊宣

王欲毀者是也。此爲畿內之明堂。卽子月日至郊天之太壇也。故混以爲布治之堂者。非是。第其制不一。殆不可考。據考工記。周明堂五室。室二筵。大戴禮云。明堂凡九室。室四戶八牖。上圓下方。朱子謂古人制事多用井田遺制。則明堂當有九室。如井田制也。○邢昺曰。舊說明堂在國之南。去王城七里。以近爲嫌。南郊去王城五十里。以遠爲嚴。五帝卑於昊天。所以於郊祀昊

天於明堂祀上帝也。上帝卽天也。天以形體言。上帝以主宰言。一說。上帝。五方上帝也。謂東方青帝靈威仰。南方赤帝赤熛怒。西方白帝白招拒。北方黑帝汁光紀。中央黃帝含樞紐。○鄭氏曰。周公攝政。因行郊天之祭。乃尊始祖以配之也。因祀五方上帝於明堂。乃尊文王以配之也。○邢昺正義曰。禮無二尊。既以后稷配郊。天不可又以文王配之。因享明堂。而以文王配之。是

周公嚴父配天之義也。亦所以申文王有  
尊祖之禮也。○吳澄曰。冬至於國門外之  
南郊築壇爲圓丘祀天。而以始祖后稷配。  
季秋於文王廟之前堂祀帝。而以文王配。  
后稷封於郃。周家有國之始。文王三分有  
二。周家有天下之始。故以后稷配天。文王  
配帝也。此禮一定。而周公祖父。世世得配  
天帝。此周公所以獨能遂其嚴父之心也。  
然亦因其功德。禮所宜然。非私意也。四海

之內。謂四方諸侯。其職。謂土物之貢。○按周禮。侯服貢祀物。註云。犧牲之屬。甸服貢嬪物。註云。絲帛也。男服貢器物。註云。尊彝之屬。采服貢服物。註云。玄纁絺纈也。衛服貢材物。註云。八材也。要服貢貨物。註云。龜貝也。來祭。來助祭也。○鄭氏曰。君行嚴配之禮。則德教刑於四海。海內諸侯。各修其職。來助祭也。○何以加。言無以加也。鄭氏曰。言無大於孝者。正義曰。既明聖治之義。

乃總其意而答之也。周公聖人，首爲尊父配天之禮。以極於孝敬之心。則夫聖人之德，又何以加於孝乎。○司馬光曰：武王克商，則后稷文王，固有配天之尊矣。然居位日寡，禮樂未備，政教未洽，其於尊顯之道，猶若有闕。及周公攝政，制禮作樂，以致太平。四海之內，無不服從，各率其職，以來助祭。然後聖人之孝，於斯爲盛。○董鼎曰：夫子言昔者周公之制禮也，郊祀祭天，則以



后稷配。尊后稷猶天也。宗祀祭帝。則以文王配。尊文王猶帝也。周公之所以尊敬其祖父如此。是以德教刑於四海。四海之內。爲諸侯者。各以其職分所當然。皆來助祭。敬供郊廟之事。孝道之感人若是。則夫聖人之德。又有何者。可以加於孝乎。夫子答曾子之問。意已盡矣。下文復申言聖人教人以孝之故。○愚意上言周公其人。此故卽以周公之嚴父配天申明之。夫萬物本

乎天。人本乎祖。於郊祀天。於明堂宗祀上帝。本天之義也。郊祀配以后稷。宗祀配以文王。本祖之義也。幽既有以盡誠敬於天。親明自有以輸誠敬於四海。各以其職。駿奔走在廟。所必致也。使非聖治之所孚。而配天之允當。其何以臣人心服若是哉。洵乎聖人之德。無以加於孝也。

故親生之膝下。以養父母。日嚴。聖人因嚴以敬。敬因親以愛。聖人之教。不肅而成。其政

不嚴而治其所因者本也。

一本養字下有其宅。

養羊尚反。○親猶愛也。膝下謂孩幼之時。嬉戲於父母之膝下也。按內則云子生三月。妻以子見於父。父執子之右手。孩而名之。按說文云孩小兒笑也。謂指其頤下。令之笑而爲之名。故知膝下謂孩幼之時也。養奉養也。嚴尊嚴也。○鄭氏曰言愛親之心。生於孩幼。比及年長。漸識義方。則日加尊嚴。能致敬於父母也。○邢昺正義曰。此

更廣陳嚴父之由。言人倫正性。必在蒙幼之年。教之則明。不教則昧。○一說。親。父母也。言親生之。而在膝下。一體而分。戀慕相親。自有愛心。及孩幼漸長。奉養父母。日益尊嚴。自有敬心。○愚意。孩提之童。無不知愛其親。故親生於膝下。家人有嚴君焉。父母之謂也。故長以養父母曰嚴。○聖人謂明王也。聖者通也。稱明王者。言在位無不照也。稱聖人者。言用心無不通也。敬。禮敬

也。愛慈愛也。○鄭氏曰：聖人因其親嚴之心，敦以愛敬之教，故出以就傅，進而過庭，以敬也。抑搔癢痛，懸衾篋枕，以教愛也。○邢昺正義曰：父子之道，簡易則慈，孝不接，狎則怠慢生焉。故聖人因其親嚴之心，敦以愛敬之教也。○按禮內則子能食，教以右手，能言，男唯，女俞，男鞶革，女鞶絲，集說曰：食，飯也。以，用也。唯，俞，皆應辭。鞶，帶也。革，皮也。絲，帛也。食用右手，取其強也。此男

女之所同。男應速。女應緩。男用皮。女用帛。剛柔之義也。此男女之所異。六年。教之數。與方名。七年。男女不同席。不共食。八年。出入門戶。及卽席飲食。必後長者。始教之讓。九年。教之數日。集註曰。數。謂一十百千萬。方名。謂東西南北。八年。入小學之時也。不。同席而坐。不共器而食。教之有別也。出入門戶。後長者。行之讓也。卽席後長者坐之。讓也。飲食後長者食之讓也。數日。知朔望。

與六甲也。此兼男女而言。十年出就外傅。居宿於外。學書計。衣不帛襦袴。禮帥初朝。夕學幼儀。請肄簡諒。集註曰。書字體。計。算法。襦。上衣。袴。下衣。肄。亦習也。簡。要也。諒。信也。自此至尚左手。皆言男子之事。十年曰幼學。故就外傅而學焉。日居夜宿皆在於外。恐其離傅而間斷也。學六書與九數。以備用也。不以帛爲襦袴。而以布爲之。防奢靡也。所行禮節皆循初時之所教。慮其妄

有改爲也。朝夕所學。皆少事長之儀。欲其  
熟而安也。其業必請於傅。擇其簡要信實  
者而習之。防其鶩與欺也。十有三年。學樂  
誦詩。舞勺。成童舞象。學御。集註曰。樂。六樂  
詩。樂章。勺。詩作酌。美武王之詩也。舞勺。舞  
象。歌勺象之詩。以爲節而舞也。射。五射。御  
五御。學樂誦詩。所以養性情也。學舞。所以  
養血脉也。舞勺。學武也。舞象。學文也。文經  
之。武緯之。則志氣適於中和。而大人之全



德可馴致矣。二十而冠。始學禮。可以衣裘。帛。舞大夏。惇行孝弟。博學不教。內而不出。集註曰。冠。加冠也。禮。五禮也。裘。皮服。大夏。夏禹之樂。樂之文武兼備者也。惇。篤也。博。廣也。冠。則成人矣。故可以學禮。冠而後服。備。而衣裘帛。八年教遜讓。十年學幼儀。則已知孝弟之道矣。至此益加以篤行也。孝弟百行之本。故先務惇行而後博學也。博學於文。而不教人。恐所學未精也。內畜其

德而不暴於外。切於爲己也。愚意教敬教愛。雖不指此。然此亦教所不能外。故附載以便幼學參考焉。○董鼎曰。聖人恐其狎恩恃愛。而亦失於不敬。於是因嚴教敬。使愛而不至於褻。又因親教愛。使敬而不至於疎。○鄭氏曰。聖人順羣心以行愛敬。制禮則以施政教。亦不待嚴肅而成理也。○邢昺正義曰。言亦不待嚴肅而成理也者。三才章已有成理之言。故云亦也。○董鼎

曰。所以教之愛敬者。不過啓其良心。發其善性。而非有所待乎外也。故其教不待肅而自成。其政不待嚴而自治。○本。鄭氏曰。謂孝也。○一說。本爲天性。○范祖禹曰。天地之生萬物。惟人爲貴。人有天地之貌。懷五常之性。故人之行。莫大於孝。聖人者。人倫之先也。惟孝爲大。嚴父。孝之大者也。天子有配天之理。配天。嚴父之大者也。自周公始行之。故郊祀后稷以配天。宗祀文王。

以配上帝。四海之內。皆來助祭也。所謂得萬國之懽心。事先王者也。聖人德至已如此。惟生於心也。孩提之童。無不知愛其親者。故循其本而言之。親愛之心。生於膝下。此其生知之良心。親既長矣。則知養父母。而日加敬矣。此亦其自然之良心也。聖人非能強人以爲善。順其性。使明於善而已矣。愛敬之心。人皆有之。故因其有嚴而教之。敬。因其有親而教之。愛。此所以教不肅。

而成。政不嚴而治。其治同者。因於人之天性故也。○愚按此見愛敬生於人心之自然。聖人因其自然之情。而教之以當然之則。故施教者無煩多術。而受教者亦無所矯勉也。教之不整肅而自成。政之不嚴威而自治者。無他。其所因者。本故也。

父子之道。天性也。君臣之義也。

一本。父子。上有子。日二字。

天性下。義下。俱無也。字。

鄭氏曰。父子之道。天性之常。加以尊嚴。又

有君臣之義。○邢昺正義曰。此言父子恩親之情。是天生自然之道。父以尊嚴臨子。子以親愛事父。尊卑既陳。貴賤斯位。則子之事父。如臣之事君。○董鼎曰。父子之道。天性。謂親也。君臣之義。謂嚴也。○愚意惟親。故用愛也。摯。惟嚴。故用敬也。誠。

父母生之。續莫大焉。

續。連也。言子繼於父母。相連不絕也。或作續。○鄭氏曰。父母生子。傳體相續。人倫之

道莫大於斯。○邢昺正義曰。易稱乾元資始。坤元資生。又論語曰。子生三年。然後免於父母之懷。是父母生已。傳體相續。此爲大焉。○吳澄曰。人子之身。氣始於父。形成於母。其續是爲至親。無有大於此者。○愚意人之有身。乃父精母血而成。一體相連續。水源木本。萬榦千流。皆由此出。毫忽難假也。乃背棄其本生之父母。而流入異端。別尋支派。狂悖莫甚。又無後者。不立本宗。

孝經身角 卷六  
傳代。強以異姓鍾愛者繼嗣。爭田奪產。訐  
訟公庭。徇一己之私意。亂承祧之大典。豈  
不惑歟。

君親臨之。厚莫重焉。

鄭氏曰。謂父爲君以臨於己。恩義之厚。莫  
重於斯。○邢昺正義曰。言有父之尊。同君  
之敬。恩義之厚。此最爲重也。○司馬光曰。  
有君之尊。有親之親。恩義之厚。莫此爲重。  
○范祖禹曰。父慈子孝者。於天性。非人爲。



之也。父尊子卑。則君臣之義立矣。故有父子。然後有君臣。中庸曰。父母其順矣乎。父子之愛。子之孝。父皆順其性而已矣。君臣之義。生於父子。人非父不生。非君不治。故有父斯有子。有君斯有臣。天地定位。而父子君臣立矣。父母生之。續其世。莫大焉。有君之尊。有親之親。以臨於已。義之存。莫重焉。能知此。則愛敬隆矣。○吳澄曰。既爲我之親。又爲我之君。而臨乎上。其分隆厚。是

爲至尊。無有重於此者。○愚意人或受人  
些小惠。愛輒感激不置。必思報効。獨於父  
母厚恩。漠然若忘。何謬也。聖人故不憚  
言之煩。而曰莫大。又曰莫重。連類以及。其  
殷殷垂訓之心。良厚矣。

故不愛其親。而愛他人者。謂之悖德。不敬其  
親。而敬他人者。謂之悖禮。

一本。不愛其親。上。多。子曰二字。

悖薄對反。○悖。逆也。○鄭氏曰。言盡愛敬  
之道。然後施教於人。違此。則於德禮爲悖。

也。○邢昺正義曰：此說愛敬之失。悖於德禮之事也。○董鼎曰：由愛敬其親而推以愛敬他人，則爲順；不愛敬其親而先以愛敬他人，則爲逆矣。○吳澄曰：由本及末爲順，舍本趨末爲逆。○愚按：愛親者不敢惡於人，敬親者不敢慢於人，人固當愛敬。然施由親始，反是則德禮皆悖。吾見愛人敬人者有矣，未見有愛親敬親者也。聖人兩以悖逆警之，正以示人愛敬之序也。又按

邢氏曰不愛敬其親者是君上不能身行  
愛敬也。而愛他人。敬他人者是教天下行  
愛敬也。君自不行愛敬而使天下人行是  
謂悖德悖禮也。雖與鄭註意同。然專責於  
其君。立論不無偏僻。此節本旨則上自天  
子。下逮庶人。皆統攝於內。不若董氏吳氏  
二家之說。爲明且正也。下節係屬君上便  
是。

以順則逆。民無則焉。

鄭氏曰。行敬以順人心。今自逆之。則下無所法則也。○愚按此言人君教愛敬。必先自盡其愛敬於親。而後民得以觀感取法焉。此順道也。不然。則逆而施之矣。民又何所取法乎。○以順則逆下。刊誤本吳本皆刪去。朱申定本不刪。

不在於善。而皆在於凶德。雖得之。君子不貴

也。一本。不貴上。多所字。下無也字。

鄭氏曰。善。謂身行愛敬也。凶。謂悖其德禮

也。言悖其德禮。雖得志於人上。君子之不貴也。○邢氏曰。在。謂心之所在也。凶。謂凶害於德也。如此之君。雖得志於人上。則古先哲王聖人君子之所不貴也。○得。一說謂得悖德悖禮。愚意上凶德。卽所謂悖德悖禮。下以雖得之接。正含多少婉諛意在內。若指悖德悖禮言。立說定應剴切。觀下君子則不然可見。又此蓋言人君苟不在於愛敬之順。而悉出於逆。縱居人上。稱曰

得志。君子視之。直幸免危亡者耳。方賤惡之。豈以爲貴乎。

君子則不然。

鄭氏曰。不悖德禮也。○愚按君子所以不貴乎彼者。誠以撫御臣民。自有所謂身先之本。悖德悖禮。則非臨下之道。故不出此也。

言思可道。行思可樂。

一本。思作斯。

樂音洛。○鄭氏曰。思可道而後言。人必信

也。思可樂而後行。人必悅也。○邢昺正義曰。言者。心之聲也。思者。心之慮也。可者。事之合也。道。謂陳說也。行。謂施行也。樂。謂使人悅服也。○愚按。言行爲立身之夫節。必可道而後言。不然。則不輕言。必可樂而後行。不然。則不遽行。謹。禦乎先。慎。持於後。言斯可道。行斯可樂矣。

德義可尊。作事可法。

德者。得於理也。義者。宜於事也。作。謂造立。



也。事。謂施爲也。○鄭氏曰。立德行義。不違道正。故可尊也。制作事業。動得物宜。故可法也。○愚按。君子一言一行。皆無所苟。自然成其德義。合於事宜矣。豈不可尊可法哉。

容止可觀。進退可度。

鄭氏曰。容止。威儀也。必合規矩則可觀也。進退。動靜也。不越禮法則可度也。○愚按。動容周旋。無不中禮。雖聖人性德之事。然

可觀可度。自有漸進自然之勢。二者亦從  
慎言行得來。而慎言行終不外於愛敬。愛  
敬終必由已親始也。

以臨其民。是以其民畏而愛之。則而象之。

鄭氏曰。君行六事。臨撫其人。則下畏其威。  
愛其德。皆放象於君也。○愚按。君子有此  
可道六事。本諸身。則徵諸庶民。罔不信從  
矣。其有自用自尊者乎。畏愛則象。正應上  
民無則句。

故能成其德教而行其政令。一本行其政令無其字。

鄭氏曰。上正身以率下。下順上而法之。則德教成。政令行也。○愚按此總結上文。德教政令皆指愛敬言。惟君子順而不逆。故能成其行也。

詩云。淑人君子。其儀不忒。

詩。曹風鴈鳩之篇。淑。善也。忒。差也。○鄭氏曰。義取君子威儀不差。爲人法則。○邢昺正義曰。夫子述君子之德既畢。乃引詩以

贊美之。○范祖禹曰。君子愛親而後愛人。推愛親之心以及人也。夫是之謂順德。敬親而後敬人。推敬親之心以及人也。夫是之謂順禮。若夫有愛心而不知愛親。乃以愛人。是心也。無自而生焉。有敬心而不知敬親。乃以敬人。是心也。亦無自而生焉。無自而生者。無本也。故謂之悖。自內而出者。順也。自外而入者。逆也。不施之親而施之他人。是不知己之所自生也。以爲順則逆。

不可以爲法。故民無則焉。失其本心。則日入於惡。故不在於善。皆在於凶德。雖得志於人上。君子不貴也。君子存其心。修其身。爲順而不悖。言斯可道。皆法言也。行斯可樂。皆善行也。德義可尊。作事可法。所以表儀於民。容止可觀。進退可度。德充於內。故禮發於外。美之至也。以此臨民。則民畏其敬。而愛其仁。則其儀而象其行。故以德教先民。而無不成。以政令率民。而無不行。詩

云。淑人君子。其儀不忒。言其德之見於外也。愚按此詩刺用心之不壹而作。此則言君子之有常度。而其心一。故儀不忒也。引以明聖德之見於威儀者。可觀可法。足以化人如此。

男 飛鵬

鳴謙

校對

孝經

孝經

趙起蛟集解

紀孝行章第十

邢昺正義曰。此章紀錄孝子事親之行也。前章孝治天下。所施政教。不待嚴肅。自然成理。故君子皆由事親之心。所以孝行有可紀也。故以名章。次聖人之後。或於孝行之下。又加犯法兩字。今不取也。○愚按刊誤。此章釋始於事親。及不敢毀傷。爲傳之七章。吳草廬較定。今文

本合五刑章凡百二十八字釋始於事親爲傳之八章又章首言孝始於事親次章列愛敬條目皆未明言故於此特發明之

子曰孝子之事親也居則致其敬養則致其樂病則致其憂喪則致其哀祭則致其嚴五者備矣然後能事親

一本孝子之事親下無也字

養羊尚反下同樂音洛喪平聲○居謂平居暇日無事之時致者推之而至其極也



敬者常存恭敬不敢慢易也。鄭氏所謂平居必盡其敬是也。一說恭己之身不近危辱亦通。○養謂飲食供奉也。樂者歡樂悅親之志也。鄭氏所謂就養能致其歡是也。○病者謂父母有疾疾甚而病也。憂憂慮不寧處也。鄭氏所謂色不滿容行不正履是也。○喪謂不幸親死服其喪也。哀哀感追念痛切也。鄭氏所謂擗踊哭泣盡其哀情是也。○祭謂親沒而祭祀之。嚴謂精潔。

肅敬謹畏將事也。鄭氏所謂齋戒沐浴。明發不寐是也。一說嚴猶慕也。○邢昺正義曰。爲人子能事其親而稱孝者。謂平常居處家之時也。當須盡於恭敬。若進飲食之時。怡顏悅色。致親之孝。若親之有疾。則冠者不櫛。怒不至詈。盡其憂謹之心。若親喪亡。則攀號毀瘠。終其哀情也。若卒哀之後。當盡祥練。及春秋祭祀。又當盡其嚴肅。此五者。無限貴賤。有盡能備者。是其能事親

○董鼎曰。此教之以善也。人有一身。心爲之主。士有百行。孝爲之大。爲人子者。誠以愛親爲心。而不忘事親之孝。平居無事。常有以致其敬。則敬存而心存。一敬旣立。遇養則樂。遇病則憂。遇喪則哀。遇祭則嚴。五者有一不備。不可爲能。然皆以敬爲本。○愚按本義。事親者。必敬樂憂哀嚴五者兼備。方可言能。正見兼備之難。然條目雖分。而意義實一。董氏本敬之說。乃發明所以

兼備之故。非謂樂憂哀嚴可不必也。蓋人  
惟不敬。故平居多玩忽。而奉養則徒供口  
體。疾病則委命醫巫。臨喪惟事繁文。祭祀  
務了故事。不樂不憂不哀不嚴。皆由於不  
敬。則敬洵爲樂憂哀嚴之本也。又父母在  
堂。不思致敬。盡禮。而雕木爲佛。塑泥爲神。  
朝夕焚香拜跪。謂敬之有大功。得冥福。夫  
天地間。有何神佛。父母卽是神佛。舍父母  
而別求神佛。妄已。惑已。如神佛有靈。亦必

不以不孝者之尊崇而錫以多福以孝者  
之疎遠而加以殃咎又何爲不返其敬神  
佛之心以敬其父母哉此孝子所以居則  
致敬以事親也宰肥烹鮮讌會賓客求盡  
其歡無所不至而父母饗殮隨行逐隊置  
若等閒甚或兄委諸弟弟推諸兄計日輸  
派準錢供給父母當此有不神傷者乎故  
必艱難不使親知儲餘以待親與竭力以  
事委曲承歡斯之謂孝養若夫父母有疾

人子憂慮之餘。惟有徧訪名醫。哀求救療。湯藥之外。誠禱上蒼而已。別肝割股。醫方所不載。使肝股可愈病。卽斷臂衛身。亦所不惜。然斷無投此而疾瘳者。有之亦倖逢其機耳。况傷股不過潰爛。去肝未有不死。不能去父母之疾。而反貽父母悲傷。欲延親年。而適以速親死也。可不戒哉。不幸而親歿。稱家有無。棺槨衣衾。必誠必信。如禮所謂餽粥不食。躡踊無數。水漿不入口。致

其哀毀。庶可以觀。乃供佛飯僧。脩齋設醮。作爲無益。以招親過。豈不悖禮。又親賓往弔。鼓樂歌唱。旅酬痛飲。當哀而樂。尤屬狂悖。至於音容既隔。修其歲祀。齊明盛服。肅敬以將。僂然如聞。愴然如見。當祭之嚴。其親一如生存之嚴。其父此祭則致其嚴之謂也。

事親者。居上不驕。爲下不亂。在醜不爭。

居上。鄭氏曰。當莊敬以臨下也。爲下。鄭氏

曰。當恭謹以奉上也。醜。衆也。爭。競也。在醜。鄭氏曰。當和順以從衆也。○邢昺正義曰。居上位者。不可爲驕溢之事。爲臣下者。不可爲撓亂之事。在醜輩之中。不可爲忿爭之事。○董鼎曰。此戒之以不善也。孝子之事親者。居人上。則當莊敬以臨下。而不可驕矜。爲人下。則當恭敬以事上。而不可悖亂。在己之醜類等夷。則當和順以處衆。而不可爭競。○愚按。居上能敬。則不驕。爲下



能敬。則不亂。在醜能敬。則不爭。

居上而驕。則亡。爲下而亂。則刑。在醜而爭。則兵。

亡。喪亡。刑。刑戮。鄭氏謂以兵刃相加。○邢  
昺正義曰。居上須去驕。不去。則危亡也。爲  
下須去亂。不去。則致刑辟。在醜輩須去爭。  
不去。則兵刃或加於身。○董鼎曰。苟居上  
而驕。則失道而取亡。爲下而亂。則犯分而  
致刑。在醜而爭。則啓釁而召兵。○吳澄曰。

居人之上。而矜肆以陵下。則必取滅亡。爲人之下。而悖逆以犯上。則必遭刑戮。在同等之中。而與之鬪爭。則必相戕殺。○愚按此極言驕亂爭之禍。三則字。正見勢所必至。理有固然。不必亡而後知也。卽其驕傲之時。而喪亡之機已兆。不必刑而後知也。卽其悖亂之時。而刑戮之禍已萌。不必兵而後知也。卽其爭競之時。而兵凶之象已著。此居上之所以不可驕。爲下之所以不

可亂。在醜之所以不可爭也。又矜不可無  
爭不可有。與我等夷。爭其勝負。必啣怨思  
報。故兵不定。是干戈。凡陰謀陷害。非禮相  
加。皆是。

三者不除。雖日用三牲之養。猶爲不孝也。

一本。

三者上  
有此字。

三牲。鄭氏曰太牢也。孝以不毀爲先。此上  
三事。皆可亡身而不除之。雖日致太牢之  
養。固非孝也。○邢昺正義曰。若三者不除。

雖復日日能用三牲之養。終貽父母之憂。猶爲不孝之子也。○董鼎曰。曰驕。曰亂。曰爭。三者不除。而曰亡。曰刑。曰兵。三者必至。危亡之禍。憂將及親。其爲不孝大矣。雖日具牛羊豕三牲之養。自以爲盡禮。親得安坐而食乎。故曰。猶爲不孝也。又曰。此章以敬爲主。則有前之善。無後之不善。不敬者。反是。事親而欲盡孝者。可不愛親而先盡敬乎。○吳澄曰。事親者。以身不毀傷爲孝。

三者皆喪身之事。苟或不除。則親之遺體。將不能保。雖曰具盛饌以養親之口體。何足爲孝哉。○愚意除者。不獨外面無驕亂爭之迹。卽心裏亦絕去驕亂爭之萌。苟或不然。潛滋暗長。安保其不見於動作威儀耶。故聖人於篇末。特以不孝警之。蓋能除卽菽水可以承歡。不除卽牲牢難以言孝。事親而徒養口體者。其亦知所勉哉。○范祖禹曰。居則致其敬者。舜夔夔齊慄。文王

朝於王季曰三。是也。養則致其樂者。舜以天子養。曾子養志是也。病則致其憂者。武王養疾。文王一飯。亦一飯。文王再飯。亦再飯是也。喪與祭。孝之終也。備此。然後能事親。居上不驕。爲下不亂。在醜不爭。皆恐危其親也。居上而驕。則天子不能保四海。諸侯不能保社稷。故亡。爲下而亂。則入刑之道也。在醜而爭。則興兵之道也。孝莫大於寧親。三者不除。災必及親。雖能備物以養。

猶爲不孝也。

男

飛鵬  
鳴謙

校對

孝經



孝經

趙起蛟集解

五刑章第十一

邢昺正義曰。此章五刑之屬三千。案舜命臯陶云。汝作士。明於五刑。又禮記問喪云。喪多而服五。罪多而刑五。以其服有親疏。罪有輕重也。故以名章。以前章有驕亂忿爭之事。言此罪惡。必及刑辟。故此次之。○愚案此爲刑誤傳之八章。吳草廬因朱子有此由上文不孝之云。

而繫於此一語。遂合上爲一章。又刑以輔教之所不及。聖人不徒恃刑。而亦不廢刑。明刑以弼教也。

子曰。五刑之屬三千。而罪莫大於不孝。

於一本作于。

五刑。墨劓。剕宮。大辟也。○邢昺正義曰。此五刑之名。皆尚書呂刑文。孔安國云。割其額而涅之曰墨刑。額也。謂刻額爲瘡。以墨塞瘡孔。令變色也。墨。一名黥。又云截鼻曰劓。剕足曰剕。釋言云。剕。剕也。李巡曰。斷

足曰刑。是也。又云宮淫刑也。男子割勢。婦人幽閉。次死之刑。以男子之陰。名爲勢。割去其勢。與採出其陰。事亦同也。婦人幽閉。閉於宮。使不得出也。又云大辟。死刑也。案鄭註周禮司刑引書傳曰。決關梁。踰城郭。而略盜者。其刑膺。男女不以義交者。其刑宮。觸易君命。革輿服制度。姦軌盜攘傷人者。其刑劓。非事而事之。出入不以道義。而誦不詳之辭者。其刑墨。降畔寇賊。劫略奪。

攘矯虔者。其刑死。案說文云。臏。膝骨也。刑臏。謂斷其膝骨。鄭註不言臏。而云剕者。據呂刑之文也。屬。猶條也。三千。邢昺正義曰。案周禮司刑掌五刑之法。以厲萬民之罪。墨罪五百。劓罪五百。宮罪五百。剕罪五百。殺罪五百。合二千五百。至周穆王乃命呂侯入爲司寇。令其訓暢。夏禹贖刑。增輕削重。依夏之法。條有三千。則周三千之條。首自穆王始也。呂刑云。墨罰之屬千。劓罰之

屬千。荆罰之屬五百。宮罰之屬三百。大辟之罰。其屬二百。故曰。五刑之屬三千。○鄭氏曰。條有三千。而罪之大者。莫過不孝。○邢昺正義曰。舊註說及謝安袁宏王獻之殷仲文等。皆以不孝之罪。聖人惡之。云在三千條外。此失經之意也。案上章云。三者不除。雖日用三牲之養。猶爲不孝。此承上不孝之後。而云三千之罪。莫大於不孝。是因其事而便言之。本無在外之意。案檀弓

云子弑父。凡在宮者殺無赦。殺其人。壞其室。洿其宮。而豬焉。既云學斷斯獄。則明有條可斷也。何者。易序卦稱有天地。然後萬物生焉。自屯蒙至需訟。卽爭訟之始也。故聖人法雷霆以申威。刑所興。其來遠矣。唐虞以上。書傳靡詳。舜命皋陶。有五刑。五刑斯著。案風俗通曰。皋陶謨。是虞時造也。及周穆王訓夏。李愷師魏。乃著法經六篇。而以盜賊爲首。賊之大者。有惡逆焉。決斷不

違時。凡赦不免。又有不孝之罪。並編十惡之條。前世不忘。後世爲式。而安法不孝之罪。不列三千之條中。今不取也。○董鼎曰。古用肉刑。漢文帝始除之。斬左趾者。笞五百。當劓者。笞三百。率多死。景帝又定律。笞五百曰三百。笞三百曰二百。五刑之屬三千。孔子蓋引此句。以爲刑罰之條目。雖如此其多。而罪之至大者。無過於不孝。則不孝者。天地所不容也。上章已足爲天子諸

侯卿大夫之戒矣。於此又兼士庶人之戒焉。○愚意人之敢於身犯不孝者。以不孝爲罪之小者耳。詎知罪條之多。不孝爲大哉。故夫子特深警之。夫不孝之子。明卽能逃國法。而幽斷難逃天譴。或斬其嗣。或踵其行。非莫大之明驗歟。

要君者無上。非聖人者無法。非孝者無親。

要平聲。○要有挾而求也。鄭氏曰。君者。臣之稟命也。而敢要之。是無上也。聖人制作



禮樂而敢非之。是無法也。善事父母爲孝。而敢非之。是無親也。○邢昺正義曰。案晉語云。諸大夫迎悼公。公曰。孤始願不及此。孤之及此。天也。抑人之有元君。將稟命焉。明凡爲臣下者。皆稟君教命。而敢要以從己。是有無上之心。故非孝子之行也。若臧武仲以防求爲後於魯。晉舅犯及河。授璧請亡之類是也。又曰。聖人規模天下。法則兆民。敢有非毀之者。是無聖人之法也。孝

爲百行之本。敢有非毀之者。是無親愛之心也。○一說。非聖人。非孝。謂人之所行。非聖人之道。子之所行。非孝道也。○愚按。要君之事。非一。或倚勢力。或用智術。或假名義。以挾持其君。使之不得不從。以遂其欲者。皆謂之要君。非聖之事。不一。或譏禮爲僞首。或譏義爲爭端。或譏一切法度爲桎梏。皆謂之非聖。非孝之事。不一。藐定省爲過禮。指終喪爲不情。鄙終身孺慕者爲曲。

謬。皆謂之非孝。又人而要君。及非聖非孝者。其肇端皆起於不孝。惟不孝。故敢於要君。忍於非聖。孝則安分循理。必不爲悖逆之事。必不行詆毀之術矣。經因言不孝之罪。故連類及此。

此大亂之道也。

鄭氏曰。言人有上三惡。豈惟不孝。乃是犬亂之道。○邢昺正義曰。言人不忠於君。不法於聖。不愛於親。此皆爲不孝。乃是罪惡。

之極。故經以大亂結之也。○司馬光曰。無上則統紀絕。非法則規矩滅。無親則本根蹙。三者大亂之所由生也。○董鼎曰。此極言不孝之罪。所以爲大。蓋人必有親以生。有君以安。有法以治。而後人道不滅。國家不亂。若三者皆無之。此乃大亂之道也。三者又以不孝爲首。蓋孝則必忠於君。必畏聖人之法矣。惟其不孝。不顧父母之養。是以無君臣。無上下。詆毀法令。觸犯刑辟。不

孝之罪。蓋不容誅也。○愚意三惡由於不孝。不孝卽爲大亂之道。則罪孰有大於此者乎。危言及此。所以勉人爲孝者。益加切矣。又亂只在一家。未及天下。○范祖禹曰。人之善。莫大於孝。其惡莫大於不孝。故聖人制刑。不孝之罪爲大。君者。臣之所稟令也。而要之。是無上。聖人者。法之所自出也。而非之。是無法。人莫不有親。而以孝爲非。則是無其父母。此三者。致天下大亂。

之道也。聖人制刑以懲夫不孝。要君非聖  
之人。所以防天下之亂也。

男

飛鵬

鳴謙

校對

孝經

孝經

趙起蛟集解

廣要道章第十二

邢昺正義曰。前章明不孝之惡。罪之大者。及要君非聖人。此乃禮教不容。廣宣要道。以教化之。則能變而爲善也。首章略云。至德要道之事。而未詳悉。所以於此申而演之。皆云廣也。故以名章。次五刑之後。要道先於至德者。謂以要道施化。化行而後徧彰。亦明道德相成。所以

互爲先後也。○愚按刊誤爲傳之二章。釋要道。吳草廬爲傳之六章。爲申釋要道。民用和睦。上下無怨。又上章明刑。使人知所戒。此章明要道。使人知所守。

子曰。教民親愛。莫善於孝。教民禮順。莫善於悌。移風易俗。莫善於樂。安上治民。莫善於禮。

四於字。一本作于。

風者。上之化所及。俗者。下之習所成。韋昭曰。人之性。繫於大人。大人風聲。故謂之風。



追其趣舍之情欲。故謂之俗。移。謂遷就其善。易。謂變去其惡。安。謂不危。治。謂不亂。○鄭氏曰。言教人親愛禮順。無加於孝悌也。風俗移易。先入樂聲。變隨人心。正由君德。正之與變。因樂而彰。故曰莫善於樂。按詩序曰。王道衰。禮義廢。政教失。國異政。家殊俗。而變風變雅作矣。是入樂聲之義也。又曰。國史明乎得失之迹。傷人倫之廢。哀刑政之苛。吟咏情性。以風其上。故變風發乎

情。止乎禮義。發乎情。民之性也。止乎禮義。  
先王之澤也。以斯言之。則知樂者。本於情  
性。聲者。因乎政教。政教失。則人情壞。人情  
壞。則樂聲移。是變隨人心也。國史明之。遂  
吟以風上也。上受其風而救其失。乃行禮  
義以正之。教化以美之。上政既和。人情自  
洽。是正由君德也。又曰。治世之音安以樂。  
其政和。亂世之音怨以怒。其政乖。亡國之  
音哀以思。其民困。又尚書益稷篇。舜曰。予

欲聞六律五聲八音。在治忽。孔安國曰。在  
察天下理治。及忽怠者。皆是因樂而彰也。  
○鄭氏曰。禮所以正君臣父子之別。明男  
女長幼之序。故可以安上化下也。○邢昺  
正義曰。此夫子述廣要之義。言君欲教民  
親於君而愛之者。莫善於身自行孝也。君  
能行孝則民效之。皆親愛其君。欲教民禮  
於長而順之者。莫善於身自行悌也。人君  
行悌則人效之。皆以禮順從其長也。欲移

易風俗之敝敗者莫善於聽樂而正之。欲身安於上。民治於下者莫善於行禮以帥之。又曰。韶樂存於齊而民不爲之易。周禮備於魯而君不獲其安。亦政教失其極耳。夫豈禮樂之咎乎。○董鼎曰。孝所以愛其親也。故欲教民以相親相愛。則莫有善於孝者矣。悌所以敬其長也。故欲教民以有禮而順。則莫有善於悌者矣。得其和之爲樂。樂有鼓舞動蕩之意。故欲移改其風。變

易其俗，則莫有善於樂者矣。得其序之爲禮。禮有上下尊卑之分。故欲上安其君，下治其民，則莫有善於禮者矣。此四者蓋舉其要而言。然孝悌禮樂一本也。此經本以孝爲要道，而四者之中，孝又爲要。孝於親必悌於長。孝悌之人，心必和順，和則樂也。順則禮也。四者相因而舉，有則俱有矣。○吳澄曰：君教以孝，則民知有親而愛其父。君教以悌，則民知有禮而順其兄。由父子

和而被之聲容以爲樂。則氣體調暢而無有乖戾。所以風隨上而遷。俗自下而變也。由長幼之序。而著之節文以爲禮。則名分森嚴。而無有陵犯。所以爲上者不危。爲民者不亂也。○愚意此見孝弟爲教民之本。而教民孝弟。又必上之人躬行孝弟以爲倡。而後民始相率而親愛禮順。以奉行其教也。樂之實。樂斯二者。禮之實。節文斯二者。舍孝悌而言玉帛鐘鼓。未矣。

禮者敬而已矣。

敬恭敬而已矣者。竭盡無餘之詞也。鄭氏曰。敬者禮之本也。○司馬光曰。將明孝而先言禮者。明禮孝同術而異名。○朱申曰。禮有本有文。而敬爲禮之本。○董鼎曰。上文兼言孝悌禮樂四者。至此又獨歸重於禮。至於言禮。則又以敬爲主。蓋父母於子一體而分。愛易能而敬難盡。故經雖以愛敬兼言。而此獨言敬。而以禮爲重者。蓋其

所以有序而和者。未有不本於敬而能之者。故下極推廣敬之功用。○愚按丹書敬勝怠者吉。怠勝敬者滅。又曲禮首曰。毋不敬。又朱子曰。敬之一字。聖學之所以成始而成終也。又曰。敬者。一心之主宰。而萬事之根本也。敬固不重歟。其用力之方。莫如程子主一無適。與整齊嚴肅。而上蔡謝氏常惺惺之法。及尹氏所謂其心收斂。不容一物。最爲詳悉著實。學者玩索而身體之。



其於敬也幾矣。

故敬其父。則子悅。敬其兄。則弟悅。敬其君。則

臣悅。敬一人而千萬人悅。

悅一本作說。

鄭氏曰。居上敬下。盡得懽心。故曰悅也。○

司馬光曰。天下之父兄君。聖非能徧致其  
恭。恭一人。則與之同類者。千萬人皆悅。○

董鼎曰。此心之敬。隨寓而見。以此之敬。而  
敬人之父。則凡爲之子者。莫不悅矣。以此  
之敬。而敬人之兄。則凡爲之弟者。莫不悅

矣。以此之敬而敬人之君。則凡爲之臣者。莫不悅矣。彼爲人子。爲人弟。爲人臣者。本皆有敬父敬兄敬君之心。而吾先有以敬之。則深得其懽心矣。○一說敬父卽是孝。敬兄卽是弟。敬君卽是安上治民之禮。敬一人而千萬人悅。卽是移風易俗之樂。○愚意敬父則子悅。敬兄則弟悅。敬君則臣悅。是敬一人而千萬人悅也。又敬者禮之施。悅者敬之驗。效見於下。而責成於上也。

又按鄭氏註。敬一人而千萬人悅句。聯上三句爲一段。朱申註。敬一人。謂敬重天子。千萬人悅。謂天下人懽悅。亦應聯上三句。平列爲段。若邢昺正義。及董氏吳氏註。敬一人。皆曰敬父兄。及君一人也。千萬人悅。其子弟及臣。千萬人皆悅也。則又當合所敬者寡句。爲一段矣。今姑從石臺本。存疑以俟。博雅君子論定焉。

所敬者寡。而悅者衆。此之謂要道也。

一本無也字。

愚意此正申明首章要道之意。敬一人。敬何寡也。千萬人悅。悅何衆也。此卽先王之所謂要道也。○司馬光曰。所守者約。所獲者多。非要而何。○朱申曰。敬父敬兄敬君敬一人。所敬者甚寡也。子悅弟悅臣悅千萬人悅。所悅者甚衆也。上文所云。乃先王之要道。○范祖禹曰。孝於父。則能和於親弟於兄。則能順於長。故欲民親愛禮順。莫如教以孝弟樂者。天下之和也。禮者。天下

之序也。和故能移風易俗。序故能安上治民。夫風俗非政令之所能變也。必至於有樂而後治道成焉。禮則無所不敬而已。天下至大。萬民至衆。聖人非能徧敬之也。敬其所可敬者。而天下莫不悅矣。故敬人之父。則凡爲人子者。無不悅矣。敬人之兄。則凡爲人弟者。無不悅矣。敬人之君。則凡爲人臣者。無不悅矣。敬一人。而千萬人悅者。以此道也。聖人執要以御繁。敬寡而服衆。

是以不勞而治道成也。

男 飛鵬  
鳴謙 校對

子經